

廿二史考異

宋書一

廿二史攷異廿三

錢大昕學

武帝紀上

慶忌生陽城肅侯岑 按漢表陽城釐侯慶忌薨子颯

嗣王莽敗絕未見有名岑者殆東京紹封宗室侯之  
一乎

高祖以晉哀帝興寧元年歲次癸亥三月壬寅夜生

按孝穆趙皇后傳興寧元年四月二日生高祖與紀  
異

以高祖爲中兵參軍軍郡如故 軍謂建武將軍郡謂

下邳太守也晉自南渡以後軍府僚佐皆帶本州守相取其幹祿故高祖以北府參軍得領下邳太守及建義之後幕僚如劉穆之爲錄事參軍堂邑太守徐羨之除琅邪內史仍爲從事中郎劉懷慎爲鎮軍參軍彭城內史劉粹爲鎮軍參軍沛郡太守孟懷玉爲鎮軍參軍下邳太守高祖時領徐州刺史諸人所領皆徐州郡也文帝以西中郎將鎮荊州張邵爲司馬領南郡相謝晦爲荊州刺史請庾登之爲長史南郡太守南郡荊州治也張茂度爲司馬休之平西司馬河南太守休之爲荊州刺史而河南亦僑立于荊部

也始興王濬鎮湘州以庾炳之爲司馬領長沙內史  
羊希爲廣州刺史請其女夫蕭惠徽爲長史帶南海  
太守皆其例也亦有以幕僚而領縣令者如劉策祖  
參世子征虜軍事領遂成令周顒爲益州刺史蕭惠  
開府主簿帶肥鄉成都二縣令齊高帝爲南兗州刺  
史荀伯玉爲鎮軍中兵參軍帶廣陵令梁武帝爲雍  
州刺史張宏策爲錄事參軍帶襄陽令也

封公第三子義隆爲北彭城縣公 史例諸帝皆不稱  
名而以諱字代之此紀義隆字屢見蓋校書者妄改  
也此書北彭城而後但書彭城蓋依永初詔書去之

增都督南秦凡二十二州 按宋武於元興三年起義  
時都督揚徐兗豫青冀幽并入州又加督江州義熙  
元年加督荆司梁益寧雍涼併前爲十六州二年加  
督交廣二州五年加北青北徐二州八年加督湘州  
至是增督南秦是爲二十二州也胡三省注通鑑不  
詳攷本紀輒舉南徐南豫南兗郢以足之不知晉時  
僑立諸州本無南字且其時兗豫未分爲二郢州宋  
孝建中始立晉末無此州也徐州雖分爲兩然南燕  
克復之後增置北徐州未嘗以京口之徐爲南徐胡  
所舉皆誤也秦州僑立於漢中稱南秦者以別於仇

池之北秦晉末但稱秦州史家據宋制追稱之

又加公北雍州刺史 晉南渡僑立雍州於襄陽今將北伐關中故遙立北雍州領之

義真旣還爲佛佛虜所迫 卽赫連勃勃也古讀佛如弼弼勃聲相近

武帝紀下

永初元年七月平西將軍乞佛熾盤 乞佛卽乞伏也八月諸舊郡縣以北爲名者悉除寓立於南者聽以南爲号 按義熙十二年以徐州之彭城沛蘭陵下邳兖州之高平魯泰山諸郡封宋國此寓立於南之郡

也十三年以徐州之北琅邪北東莞北東海北譙北  
梁豫州之北潁川北南頓諸郡益宋國此以北爲名  
之郡也晉世僑置郡縣皆無南名州郡志稱晉明帝  
立南下邳郡成帝立南沛郡又云南義陽太守晉末  
以義陽流民僑立又云南河東太守晉成帝咸康三  
年征西將軍庾亮以司州僑戶立諸南字皆永初以  
後所加而休文追稱之非晉時已有此名也晉志元  
帝以江乘置南東海南琅邪南東平南蘭陵等郡分  
武進立南彭城郡明帝又立南沛南清河南下邳南  
東莞南平昌南濟陰南濮陽南太平

當作廣平

南泰山南

濟陽南魯等郡皆永初以後所加唐人修晉史者誤  
仞爲晉制殊憤憤矣

三年二月左衛將軍張紀爲湘州刺史 紀當作邵  
少帝紀

武帝長子也 按紀傳書諸帝皆稱廟號獨此紀書武  
帝者四而仍有稱高祖者又它篇例稱魏爲索虜而  
此紀一云魏軍克滑臺一云魏主拓跋嗣薨全非休  
文之例又如義熙十二年正月以豫章公世子爲西  
中郎將豫州刺史三月除征虜將軍徐兗二州刺史  
鎮京口十四年六月除中軍將軍副貳相國府皆宜



見於本紀而畧不及卷末又無史臣論其非休文書  
顯然蓋此篇久亡後人雜采它書以補之故義例乖  
舛如此又文帝紀首稱武帝第三子孝武帝紀稱文  
帝第三子前廢帝紀稱孝武帝長子明帝紀稱文帝  
第十一子後廢帝紀稱明帝長子順帝紀稱明帝第  
三子以至武三王文九王文五王孝武十四王明四  
王二凶傳篇首皆稱諡餘文則仍稱廟號此於史例  
殊爲可議或後來校書者以意輒改非休文本意也

長沙王道憐傳稱高祖中弟臨川王道  
規傳稱高祖少弟此當是休文本文

景平二年五月江州刺史檀道濟揚州刺史王宏入朝

按是時道濟爲南兗州刺史非江州宏爲江州刺史非揚州也揚州治輦下時以司空徐羨之領之紀所書皆誤

文帝紀

改授都督荆益寧雍梁秦六州豫州之河南廣平揚州之義成松滋四郡諸軍事西中郎將荊州刺史永初元年進督北秦并前七州又進督湘州按宋世荊州刺史常都督荆湘雍益梁寧南北秦八州諸軍事惟謝晦不督梁州臨川王義慶南郡王義宣不督湘州故但云七州

義宣後亦進督湘州

雍州刺史常都督雍梁南

北秦四州惟劉道產止督三州不督北秦也州郡志止有秦州無南北之分今攷秦州本治隴西晉南渡後寄治漢中常以梁州刺史兼之是爲南秦卽志所載秦州也仇池氏楊氏世授北秦州刺史其地不入版圖故不載于志狀南北秦之名昉于何代史家宜詳述之不應竟闕晉志云江左分梁爲秦寄居梁州又立氏池爲北秦州則北秦之名東晉已有之蓋自義熙三年授楊盛始矣南徐南兗之名皆起宋初則秦州加南字亦必在宋初以後矣

元嘉六年五月以撫軍司馬檀道濟爲益州刺史 按

檀道濟時爲江州刺史未嘗除益州此當爲劉道濟

也

監本作劉

九月於秦州置隴西宋康二郡

劉道濟傳同

按州郡志秦

州無宋康郡又紀稱元嘉九年於廣州立宋康郡是同時有兩宋康矣

十八年省南徐州之南燕濮陽廣平郡

按州郡志南

徐州有南濮陽郡不言何時省併與紀不相應志又

不載南燕郡僑立本末攷晉書謝元傳云都督徐兗

青三州揚州之晉陵幽州之燕國諸軍事燕國與晉

陵連文疑卽僑立於晉陵界

虞邱進傳元興三年從定京邑除燕國內史

二十七年四月安北將軍徐兗二州刺史武陵王贊當  
諱降號鎮軍將軍 按孝武紀亦云坐汝陽戰敗降  
號鎮軍及以百官志證之則中鎮撫三號比四鎮班  
壯四安四平之上由安北改鎮軍乃是敘遷非左降  
也至次年降號北中郎將乃爲真降耳

二十九年九月撫軍將軍徐兗二州刺史蕭思話加冀  
州刺史兗州如故 是時冀州刺史張永失律思話  
爲統帥亦當任咎故解徐州除冀州刺史代永仍兼  
領兗州也紀所書未核

孝武帝紀

徙都督雍梁南北秦四州荊州之襄陽竟陵南陵順陽  
新野隨六郡諸軍事 南陵當作南陽

元嘉三十年六月以司州刺史魯爽爲南豫州刺史

按是時無南豫州南蓋衍文也自元嘉二十二年罷  
南豫州并壽陽至孝武大明三年始復分置中間無  
南豫者計十年

大明五年四月雍州刺史海陵王休茂殺司馬庾演之  
舉兵反義成太守薛繼考討斬之 按休茂傳繼考  
爲休茂盡力攻城及休茂死詐稱立義乘驛還都事  
泄伏誅則繼考乃黨于休茂者紀所書誤矣南史云

參軍尹元義起義斬之爲得其實

明帝紀

泰始元年將肆梟獍之禍騁商頓之心 商謂商臣頓  
謂冒頓也

後廢帝紀

泰豫元年閏月割南豫州南汝陰郡屬西豫州西豫州  
廬江郡屬豫州 按州郡志泰豫元年以南汝陰度  
屬豫州豫州之廬江度屬南豫州初無西豫之名朕  
南史廬陵王義真傳稱得志日以慧琳道人爲西豫  
州刺史南齊書張岱傳宋明帝初以岱堪幹舊才除

使持節督西豫州諸軍事輔國將軍西豫州刺史南  
齊州郡志太祖以西豫吏民寡刻分置兩州損費甚  
多又永明四年冠軍長史沈憲啟二豫分置以桑墾  
子亭爲斷潁川汝陽杜南譙歷陽界內悉屬西豫廬  
江居晉熙汝陰之中屬南豫求以潁川汝陽屬南豫  
廬江還西豫則當時本有西豫之稱殆以壽陽故稱  
西府因以西豫呼之而宋齊二志不以西豫標目者  
以其未著甲令也

南齊書魚復侯子響傳前稱出  
爲豫州刺史後稱在西豫時

### 順帝紀

昇明三年正月新除給事黃門侍郎蕭諱爲離州刺史



謂文惠太子也約書成於永明六年其時武帝無恙而不敢斥東宮諱其於諸王則名之

三月崇太傅爲相國總百揆封十郡爲齊公 宋書稱齊高帝曰齊王武帝曰齊王世子此變其文云太傅者不得云以齊王爲齊公也下文云以中軍大將軍諱爲南豫州刺史齊公世子副貳相國亦變其文避不辭也

### 律志

律志序 自孟堅合律歷爲一志後之作史者皆因之休文序例不言夏分爲二則亦因固彪之舊矣此志

三卷首篇當題律歷上次篇爲中末篇爲下今以首篇爲律志下二篇爲歷上歷下蓋後人妄改非休文之旨也序爲八志總例列于卷首著作之體宜兩汲古閣本題作律志尤爲乖妄

黃初中鑄工柴玉巧有意思形器之中多所造作協律都尉杜夔令玉鑄鐘其聲清濁多不中法數毀改作玉甚厭之謂夔清濁任意更相訴白于魏王 此魏王謂魏武也魏武當國之時安得有黃初之號蓋采三國志夔傳之文而誤會其旨也攷夔傳先云太祖以夔爲軍謀祭酒參大樂事教習講肄備作樂器後

云黃初中爲太樂令協律都尉此言夔所終之官也  
後又云漢鑄鐘工柴玉云云乃追敘夔造樂器時與  
玉有卻而文帝愛待玉因不悅夔之由非謂鑄鐘在  
黃初中也休文博識何不子細乃爾

歷志上

其冬下句夕在張心暑也 暑也當作署之四分乾象  
術俱有此文隋書刑法志晦朔八節六齊月在張心  
日竝不得行刑月在張心非推步不能知故司天署  
其日言于朝古人之慎刑如此

晉江左時侍中平原劉智 智字子房司空寔之弟也

仕武帝朝非江左時志誤

禮志一

書曰若稽古帝舜曰重華建皇授政改朔 攷太平御覽八十一卷引尙書中候攷河命篇云曰若稽古帝舜曰重華欽翼皇象又李善文選注引尙書中候云建黃授政改朔是此一十五字皆出中候高堂隆所引偶脫中候二字朱錫鬯欲移此文於舜典之首以代姚方興二十八字殆非也建皇文選注作建黃皇甫謐謂以土承火色尙黃也此作皇疑誤

禮志二

司徒長史王申 申當作甲王甲李乙丙丁皆設爲姓

名

毛本作壬申尤誤  
監本正作王甲

豐浴謂以香薰草藥沐浴也 周禮本作豐豐卽豐之  
省也薰覺聲相近

晉孝武太元元元年崇德太后褚氏崩 元年當作九年  
字形相涉而譌

太學博士徐恭議 晉志作徐藻

故成風顯夫人之號昭公服三年之喪 昭公徐廣傳  
作僖公朕成風之夢不在僖公之世且安帝于李后  
爲祖母非僖公於成風之比竊謂當是文公之誤也

謂應同於爲祖母後齊衰朞 徐廣傳作齊衰三年

博士邱遲之議案吳商議閏月亡者應以本正之月爲  
忌謂正閏論雖各有所執商議爲允 此條當有脫  
文商議主六月爲忌未見有主七月者何云各有所  
執乎

禮志五

晉武帝問侍臣旄頭何義彭推對曰秦國有奇怪觸山  
載水無不崩潰唯畏旄頭故武士服之 按史記秦

本紀文公伐南山大梓豐大特正義引錄異傳云秦  
文公時雍南山有大梓樹文公伐之樹斷中有一青

牛出走入豐水中其後牛出豐水中使騎擊之不勝  
有騎墮地復上髮解牛畏之入不出故置髦頭漢魏  
晉因之彭推之說蓋出于此

樂志一

東平憲王蒼總定公卿之議曰宗廟宜各奏樂不應相  
襲所以明功德也承文始五行武德爲大武之舞又  
制舞哥一章薦之光武之廟 按范史明帝永平三  
年十月烝祭光武廟初奏文始五行武德之舞不云  
大武之舞東觀書載東平王蒼議雖有宜曰大武之  
舞一語而下文卽云不宜以名舞其所制歌詩又仍

稱武德舞則蒼足議正謂宜名武德之舞所云廟樂  
不相襲者特謂樂章不宜沿舊辭耳故明帝詔稱騁  
騎將軍議可進武德之舞如故也休文似未審上下  
文義雖刪取東觀書卻失東觀之旨

哥師尹胡能哥宗廟郊祀之曲 說文哥聲也古文以  
爲哥字篇中樂歌字皆作哥蓋用古文

晉中書令王珉與嬖婢有情愛好甚篤嬖婢捶撻過苦  
嬖卽嫂字禮食三老五更于太學蔡邕以爲五更  
也列子黃帝篇禾生子伯出行宿于田夏商邱開之  
舍注夏當作叟莊子達生篇視其後者而鞭之崔譔



本報作越云匿也史記韓世家虜得韓將鯨申差于  
濁澤徐廣云鯨一作鯨則更更二文相通久矣王右  
軍帖亦以嫫爲嫂字

空侯初名坎侯言其坎坎應節奏也後言空者訛也

予謂坎空聲相近說文引詩鞀鞀舞我鞀鞀卽坎坎

也而鞀卽从鞀得聲

讀與貢通

則坎之爲空又何疑焉休

文精于四聲而未達聲音相轉之理故動多窒礙

# 天文志一

周天一百七萬一千里一度爲二千九百三十二里七  
十一步二尺七寸四分四百八十七分分之三百六

十二 每度里步尺寸分數皆以四分舊術推之置  
周天里數四因之爲實千四百六十一爲法如法而  
一得二千九百三十二里餘數以三百乘之三百步爲里也  
爲實如法得七十一步餘數又以六乘之六尺爲步也爲  
實如法得二尺七寸四分又千四百六十一分之一  
千八十六卽四百八十七之三百六十二也分母分  
子皆以  
三約  
之

則天徑三十二萬九千四百一里一百二十二步二尺  
二寸一分七十一分分之十 以周百四十二徑四  
十五之率求之當云徑三十三萬九千四百一里一

百二十二步三尺二寸一分七十一分分之九也此文尚有差誤

天體圓如彈丸而陸續造渾象其形如鳥卵 今歐邏巴橢圓之說似出於此

劉向五紀說夏歷以爲列宿日月皆西移列宿疾而日次之 宋儒言日月五星皆左旋日行速月行遲蓋本于此

按此說應作軒昂之軒而作昕所未詳也 昕軒聲相近休文未悟古音故云未詳

符瑞志下

晉成帝咸康八年廬江春穀縣留珪夜見門內有光取得玉鼎二枚 按晉志春穀縣屬宣城不屬廬江蓋南渡後曾僑立廬江郡于此而史失載爾志又載穆帝永和元年廬江太守路永上言於春穀城北見水岸邊有紫赤光永和在咸康之後也又云成帝咸和元年宣城春穀縣山岸崩獲石鼎咸和在咸康之前其時春穀尚屬宣城蓋自蘇峻祖約作亂之後淮南流人始移江南此廬江置郡必於咸和四年以後矣  
五行志五

元帝太興初又有女子陰在腹上在揚州性亦淫京房

易妖曰人生子陰在首天下大亂在腹天下有事在背天下無後 此下又一條云晉中興初有女子其陰在腹當齊下自中國來江東性甚淫而不產京房易妖曰人生子陰在首天下大亂在腹天下有事在背天下無後此一事兩見當刪而未刪者也

### 州郡志一

何徐州郡 按何承天徐爰皆撰宋書並有州郡志承天撰史在元嘉之世所撰志惟天文律歷餘皆奉朝請山謙之作也爰書起自義熙之初訖於孝武之末休文志州郡大較以孝武大明八年爲正蓋因徐氏

之舊而亦兼載宋末事然如湘州之廣興臨慶既皆依明帝改名而汀州之晉安何以不用改名此亦自亂其例矣

揚州 丹陽尹秦鄣郡治今吳興之故鄣縣 按漢志但言故鄣郡不言秦所置裴駰注史記始以鄣郡當秦三十六郡之一此志與裴說同

海寧令孫權分欸爲休陽縣晉武帝太康元年更名

按太平寰宇記引邑圖云吳避孫休之名改爲海陽縣晉平吳之後改爲海寧縣志失書吳改名一節

南徐州 永初二年郡國志又有南沛南下邳廣平廣

陵盱眙鍾離八郡 今數之止六郡蓋脫海陵山陽

二郡

南蘭陵太守 按休文志州郡於諸州書去京都水陸若干於諸郡則書去州水陸若干去京都水陸若干唯州所治郡不云去京都水陸若干者已見於州也南徐州領郡十七南東海爲州所治此外則南琅邪晉陵義興皆有實土故有水陸里數南蘭陵以下十三郡有戶口而無水陸里數者僞寓無實土也諸州皆放此

廣陵今前漢屬泗水 陵當作凌廣字衍

南彭城太守江左僑立晉明帝又立南下邳郡成帝又立南沛郡孝武以二郡竝併南彭城按宋武帝先世彭城人過江居丹徒縣之京口里永初元年詔曰彭沛下邳三郡首事所基情義繾綣彭城桑梓本鄉加隆攸在優復之制宜同豐沛其沛郡下邳可復租布三十年此則彭沛下邳皆僑立於京口矣劉康祖彭城呂人劉毅彭城沛人劉粹沛郡蕭人史稱其家在京口孝穆趙皇后下邳僮人家亦必在京口也劉穆之秀之東莞莒人徐邈東莞姑幕人孟懷玉平昌安邱人檀韶高平金鄉人史亦言其世居京口卽此



州之南東莞南平昌南高平矣僑郡無實土故不言所治

文帝八年省廣平郡爲廣平縣 當云文帝元嘉十八年此脫三字

徐州 元徽元年分秦郡之頓邱梁郡之穀孰歷陽之鄧立新昌郡 按南齊書州郡志新昌郡領頓邱穀孰尉氏三縣無鄧縣

平昌太守後廢帝元徽元年立 平昌當作新昌

南兖州 南濮陽南泰山濟陽南魯山郡 南魯下行山字

永初郡國又有與肥如路真定新市五縣竝二漢舊名  
肥如屬遼西路屬上黨 路當作潞

新市永初郡國云四縣本屬遼西 新市下有脫文當  
云二漢晉屬中山

孝武大明五年分廣陵爲沛郡治肥如縣時無復肥如  
縣當是肥如故縣處也二漢晉太康地志竝無肥如  
縣 按志於廣陵郡下云肥如漢舊名屬遼西矣此  
云竝無肥如者謂沛郡自漢晉以來竝無肥如一縣  
非謂漢無肥如也肥如本遼西縣名因晉末僑立遼  
西郡于廣陵界後經省併故廣陵得有肥如縣符瑞

志元嘉十九年廣陵肥如石梁澗中出石鐘九口何承天修志訖于元嘉二十年其時尙有肥如故志云何有肥如新市狀則肥如之省其在拓跋南侵之後乎此條云時無復肥如者謂孝武之時廣陵已無肥如乃以其地立沛郡耳細檢此二條之文初無矛盾說者多援以爲肥如實是不狀矣

沛郡宜是大明五年以前省其時又立也 按徐州篇云文帝元嘉中分南沛爲北沛屬南兗而南沛猶屬南徐孝武大明四年以南沛併南彭城與此文可互證蓋當時沛郡流人或家江北或家江南初無實上

而徐州刺史亦兼領江北迨文帝分南徐南兖二州  
畫江爲界故以南沛之寄治廣陵者別爲北沛屬之  
南兖而江南之南沛仍如故也孝武時省江南之南  
沛而以廣陵之北沛爲南沛又分肥如地立爲郡治  
而南沛始有實土矣何云北沛徐云南沛各據當時  
之名書之其實只是一郡而休文所云大明五年以  
前省者乃省江南之南沛非省江北之沛也肥如今  
之天長縣

北淮太守宋末僑立 淮下脫陽字

兖州 永初郡國有東郡陳留濮陽三郡而無陽平郡

領白馬涼城東燕三縣 白馬三縣當屬東郡此領  
字上蓋脫東郡二字

州郡志二

南豫州 永初二年分淮東爲南豫州治歷陽淮西爲  
豫州 此下當有治壽陽三字

文帝元嘉七年又分五年割揚州之淮南宣城又屬焉  
徙治姑孰 此條當有脫文以本紀及南平王鑠傳  
攷之文帝元嘉七年罷南豫州并豫州十六年復分  
豫州之淮南爲南豫州二十二年復南豫州并壽陽  
孝武大明三年分淮南北復置二豫州五年移南豫

州治淮南于湖縣于湖卽姑孰也當云文帝元嘉七  
年合二豫州爲一十六年又分二十二年又合孝武  
大明三年又分五年割揚州之淮南宣城又屬焉則  
首尾相應矣

泰始四年以揚州之淮南宣城爲南豫州治宣城 按  
帝紀泰始五年分豫州揚州立南豫州蓋分豫州之  
歷陽揚州之淮南宣城也事見廬江王禕傳志失書  
歷陽郡又誤以爲四年事

七年復分歷陽淮陰南譙南兗之臨江立南豫州 按  
本紀孝武大明七年割歷陽秦郡置臨江郡以歷陽之烏江

攷異

九

秦郡之懷德二縣置

前廢帝永光元年罷臨江郡此後未見復

置之文

南汝陰太守江左立 此汝陰治合肥本紀泰始七年

妖寇宋逸攻合肥殺汝陰太守王穆之是也

南梁太守晉孝武太元中僑立於淮南 此淮南謂壽

春也東晉改曰壽陽避鄭太后諱向靖傳義熙八年

督馬頭淮西諸軍事龍驤將軍安豐汝陰二郡太守

梁國內史庾壽陽劉粹傳永初三年督豫司雍并四

州南豫州之梁郡弋陽馬頭三郡諸軍事豫州刺史

領梁郡太守鎮壽陽此梁郡僑立壽陽之證也壽春

本漢舊縣自太元移梁郡於此并立睢陽縣爲治所而壽春遂不爲縣名矣

安帝始有淮南故地屬徐州武帝永初二年還南豫

按太元初苻堅兵敗已復淮南其後仍沒於慕容氏至安帝義熙中劉裕平南燕淮南復入版圖志云始有者晉自南渡以後壽陽屢復屢失至是始爲晉有也此地本屬揚州江左嘗以豫州刺史鎮之義熙中始改屬徐州宋初仍屬豫州故云還

文帝元嘉二十五年以豫邵蠻民立茹由樂安光城雩婁邊城史水開化邊城七縣屬弋陽郡 邊城字重



出當去其一

雩婁下邊城  
兩字當刪

徐志有邊城兩領雩婁史水開化邊城兩縣 此上下

兩字皆誤詳其文義謂立邊城郡領雩婁等四縣也  
上兩字疑郡字之譌下兩字疑四字之譌

豫州 永初郡國何徐寄治睢陽 睢陽卽壽陽也晉  
末僑立南梁郡于壽陽并置睢陽縣後乃省壽陽入  
睢陽名實之混淆如此凡豫州屬郡言去州水陸若  
干者皆據壽陽而言

江州 豫寧侯相漢獻帝建安中立吳曰要安晉武帝  
太康元年更名 按晉志豫章郡有豫章縣無豫寧

此轉寫之訛攷王曇首以誅徐羨之等功追封豫寧  
縣侯子僧綽孫儉皆襲豫寧之封此志以豫寧爲侯  
國正相符合南史僧綽及儉傳並稱豫寧侯而宋書  
僧綽傳齊書儉傳乃作豫章亦誤也南齊志豫章郡  
亦有豫寧縣南史王亮封豫寧縣公裴之橫封豫寧  
侯則豫寧縣名自晉訖梁未之改也要安當爲西安  
之譌太平寰宇記武寧縣古西安縣也後漢建安中  
分海昏立西安縣晉太康元年改爲豫寧三國志潘  
璋傳遷豫章西安長是吳時縣名西安之證

南康公相

按劉穆之以佐命功追封南康郡公子孫

世襲晉宋之制郡爲王國則置內史爲公國則置公  
相其職與太守同

此郡旣爲公國而所領南康縣又稱公相蓋其時別有封南康縣公

南新蔡太守江左立去州水二百 晉志孝武因新蔡  
郡人于漢九江王黥布舊城置南新蔡郡卽此郡也  
元和郡縣志九江故城在黃梅縣西南七十里漢九  
江王黥布所築

青州 廣城令漢舊縣 當作歷城

司州 恒農領恒農陝宜陽暉池盧氏曲陽凡七縣  
今數之止六縣

河內寄治河南領溫野王軹河陽沁水山陽懷平皋朝歌凡十縣東京兆寄治滎陽領長安萬年新豐藍田蒲阪凡六縣合十六縣 今數之河內止九縣東京兆止五縣

州郡志三

荊州刺史漢治武陵漢壽魏晉治江陵 按魏之荊州治襄陽不能得江陵也志誤

文帝世又立宋安左郡 按司州環水縣下云宋安本縣名孝武大明八年省義陽郡所統東隨二左郡立爲宋安縣屬義陽明帝立爲郡而豫州蠻傳亦云世

宗初卽位西陽蠻田益之義之等起義攻郢州克之  
以蠻戶立宋安光城二郡以義之爲宋安太守是宋  
安郡實明帝所立矣此云文帝立宋安左郡而南豫  
州光城左郡下亦云大明八年省光城左郡爲縣屬  
弋陽則兩郡先已有之孝武時省爲縣至明帝而復  
立也

巴東公相譙周巴記云初平六年 初平紀元無六年  
巴記誤

荊州帳下司馬趙韙 荊州當作益州

建議分巴郡諸縣漢安以下爲永寧郡建安六年劉璋

改永寧爲巴東郡 漢安當作安漢攷晉宋二志安  
漢屬巴西不屬巴東也据華陽國志魚復朐忍諸縣  
初平中始分爲固陵郡建安六年魚復蹇允白璋爭  
巴名乃改固陵爲巴東若永寧之分雖與固陵同時  
其後改稱巴西與巴東不相涉

汶陽太守何志新立先屬梁州

梁一作渠誤

文帝元嘉十一

年度 按南齊書蠻傳汶陽本臨沮西界二百里中  
水陸迂狹魚貫而行有數處不通騎而水白田甚肥  
腴桓溫時割以爲郡西北接梁州新城東北接南襄  
城南接巴巫朕則汶陽郡晉時已有之何承天以爲

新立者非也

南河東太守晉成帝咸康三年征西將軍庾亮以司州  
僑戶立 按晉志渡江後以河東人南寓于漢武陵  
郡孱陵縣界上明地僑立河東郡卽此郡也桓沖爲  
荊州刺史都督司州之河東軍事亦指此宋初僑立  
諸郡例加南字

湘州晉懷帝永嘉元年分荊州之長沙衡陽湘東邵陵  
零陵營陽建昌江州之桂陽八郡立 按晉志湘州  
始置凡九郡有始安始興臨賀而無營陽建昌與此  
不合攷營陽郡晉志以爲穆帝立此志亦云江左分

零陵立則懷帝時不應有管陽矣

重安侯相 按南齊書王敬則傳始封重安縣子邑三百五十戶後增封爲千三百戶又增至二千五百戶又加五百戶戶增則爵宜序遷據此志有重安侯相知敬則杜宋末已封重安侯而傳不書者漏也齊初封敬則尋陽郡公止三千戶又知二千餘戶之必爲侯國矣

雍州 元嘉二十六年割荊州之襄陽南陽新野順陽隨五郡爲雍州 按隨郡本屬荊州孝武孝建元年度屬郢前廢帝永光元年度屬雍明帝泰始五年還



屬郢改爲隨陽後廢帝元徽四年度屬司州

見司州下是

元嘉廿六年隨未嘗屬雍也又攷宋時雍州刺史如

劉遵考劉道產蕭思話武陵王駿俱稱都督荊州之

南陽竟陵順陽襄陽新野隨六郡諸軍事蓋在元嘉

二十六年以前雍州未有實土也隨王誕以元嘉二

十六年除刺史柳元景以元嘉末孝建初兩除刺史

武昌王渾以孝建元年除刺史劉延珍以孝建二年

除刺史竝云都督荊州之竟陵隨二郡諸軍事不及

南陽等四郡者已杜雍州管內也而隨郡仍繫之荆

州可證元嘉時隨未嘗屬雍矣至大明二年除海陵

王休茂五年除永嘉王子仁及劉秀之八年除晉安  
王子勛竝稱都督郢州之竟陵隨二郡則此二郡孝  
武時屬郢州之證也及前廢帝永光元年五月割郢  
州隨郡屬雍州自後湘東王彧沈攸之除雍州刺史  
但云都督郢州之竟陵不言隨郡至明帝泰始五年  
四月隨郡又改屬郢州故張興世傳復云都督郢州  
之竟陵隨二郡也袁顗以永光元年九月張永以泰  
始四年除刺史本傳稱都督郢州之竟陵隨二郡巴  
陵王休若以泰始二年除刺史本傳稱都督荊州之  
竟陵隨二郡皆誤

汎陽今晉武帝太康五年立屬南鄉仍屬順陽 按晉

志順陽郡無汎陽

華山太守胡人流寓孝武大明元年立 按梁書康綽  
傳宋永初中康穆舉鄉族三千餘家人襄陽之峴南  
宋爲置華山郡藍田縣寄居于襄陽是華山立郡不  
始于孝武也孝武始分實土郡縣以爲僑郡縣境故  
史以爲孝武所立

州郡志四

寧州

南廣太守晉懷帝

一本作武  
帝非是

分朱提立

據晉

書王遜傳分朱提爲南廣亦遜所請也

西平太守晉懷帝永嘉五年寧州刺史王遜分興古之東立何志晉成帝立非也按王遜傳不言分立西平郡華陽國志西平郡刺史王遜時爨量保盤南遜出軍攻討不能克遜薨後刺史尹奉募徼外夷刺殺量盤南平乃割興古雲南之盤江南如南零三縣爲郡是西平非遜所分矣

東河陽太守晉懷帝永嘉五年寧州刺史王遜分永昌雲南立按王遜傳不言分立東河陽郡

梁水太守晉成帝分興古立按王遜傳遜以地勢形便上分永昌爲梁水郡此云晉成帝立又以爲分興

古地皆不合

洪亮吉曰案水經注劉禪分興古之盤南置郡於梁水縣則蜀時已有此郡東

晉復立耳

百官志上

魏及晉西朝置十九人江左初減爲九人皆不知掌何

經按魏晉十九博士固無可攷若江左之九人則

禮志載太興初議欲修立學校唯周易王氏尙書鄭

氏古文孔氏毛詩周官禮記論語孝經鄭氏春秋左

傳杜氏服氏各置博士是也

論語孝經合置博士一人

何云不知

所掌乎

百官志下

寧朔至五威五武將軍 五威者建威振威奮威揚威  
廣威也五武者建武振武奮武揚武廣武也寧朔將  
軍班杜五威五武之上而前卷敘列將軍獨遺之此  
傳寫偶脫一行耳南齊志寧朔將軍列于輔國之後  
據此志官品先後次之似寧朔當杜龍驤之後矣

宋書二

廿二史攷異廿四

錢大昕學

后妃傳

少帝司馬皇太妃 以前廢帝何皇后後廢帝江皇后  
例之當稱司馬皇后目錄亦書皇后而傳作太妃必  
刊本之譌

吳興長公主諱榮男 史家之例惟帝后書諱諸王皆  
直書名休文此傳云吳興長公主諱榮男臨川長公  
主諱英媛豫章康長公主諱欣男新蔡公主諱英媚  
皆以公主而稱諱非禮也公主可以不名卽欲名之

當如本傳會稽宣長公主與弟義興恭長公主惠媛  
東陽獻公主英娥之例不應自亂其法南史因休文  
元文不加刊削均失之矣

劉穆之傳

臣契闊屯泰旋觀始終 按契闊字見於詩擊鼓篇毛  
傳云契闊勤苦也六朝人好用此二字如王宏傳獨  
繆先眷契闊屯夷范泰傳契闊戎陣頗狼艱危王僧  
達傳契闊歷朝綢繆眷遇顏師伯傳契闊大難宜蒙  
殊報劉延孫傳契闊唯舊幾將二紀南齊書褚淵傳  
契闊屯夷綢繆終始王儉傳契闊艱運義重常懷昔



取勤苦之義

王宏傳

奏彈謝靈運曰世子左衛率康樂縣公謝靈運力人桂興淫其嬖妾殺興江涘棄尸洪流請以見事免靈運所居官 按靈運傳遷相國從事中郎世子左衛率坐輒殺門生免官卽其事也六朝人所謂門生卽僮僕之屬狀徐湛之傳門生千餘人皆三吳富人子姿質端妍衣服鮮麗每出入行遊塗巷盈滿泥雨日悉以後車載之靈運傳又云奴僮旣衆義故門生數百則門生與僮奴亦自有別南史王琨傳琨爲吏部郎

吏曹選局貴要多所屬請現自公卿下至士大夫例爲用兩門生王思遠傳內外要職竝用門生陸慧曉傳王晏選門生補內外要局是門生亦有入官之路高於僮僕一等也

檀道濟傳

以建義勲封吳興縣五等侯 按五等之封但假虛號未有戶邑蓋出一時權宜之制如長沙王道憐初封新興縣五等侯後封新渝縣男食邑五百戶檀道濟初封吳興縣五等侯後封作唐縣男食邑四百戶王鎮惡初封博陸縣五等子後追封漢壽縣子食邑五

百戶向靖初封山陽縣五等侯後封安南縣男食邑  
五百戶劉粹初封西安縣五等侯後封潁陽縣男食  
邑五百戶孟龍符初封平昌縣五等子後封臨沅縣  
男食邑五百戶劉鍾初封安縣五等侯後封永新縣  
男食邑五百戶虞邱進初封龍川縣五等侯後封望  
蔡縣男食邑五百戶胡藩初封吳平縣五等子後封  
陽山縣男食邑五百戶是五等侯尙在縣子縣男之  
下也

又增督青州徐州之淮陽下邳琅邪東莞五郡諸軍事  
文云五郡而實四郡當有脫誤謝晦傳稱青州徐

州之淮陽下邳琅邪東莞七郡七字亦誤

遷都督江州之江夏豫州之西陽新蔡晉熙四郡諸軍事征南大將軍江州刺史 江州下當有荊州二字是時江夏屬荊州孝武紀稱荊州之江夏是也

謝晦傳

及同黨庾登之孔延秀周超等竝伏誅 按下文云庾登之殷道鸞何承天竝皆原免則登之實未誅也

王鎮惡傳

索虜野坂戍主異朔公 異當作黑黑朔公卽于栗磾也栗磾爲河內鎮將好操黑袖以自標宋武帝與之

書題曰黑稍公麾下魏因拜爲黑稍將軍稍稍聲相近亦卽梁字

檀韶傳

高平金鄉人也 韶與弟祇道濟三人各有傳傳首皆云高平金鄉人王宏與弟曇首曇首子僧綽宏子僧達各有傳傳首皆云琅邪臨沂人謝瞻與弟晦謝宏微與子莊各有傳傳首皆云陳郡陽夏人劉懷肅與弟懷慎各有傳傳首皆云彭城人顏延之與子竣各有傳傳首皆云琅邪臨沂人袁淑與兄子顗粲各有傳傳首皆云陳郡陽夏人此類甚多刪而存其一可

矣

都邑旣平爲鎮軍將軍加寧遠將軍是時宋武帝爲鎮軍將軍詔爲其府參軍不當云爲鎮軍將軍也依史例當云轉鎮軍參軍此傳寫之譌非史本文之誤寧遠則雜號將軍班秩本卑故詔以參軍得帶之

遷龍驤將軍秦郡太守北陳留內史按向彌檀韶檀祇竝除秦郡太守北陳留內史虞邱進亦除秦郡太守督陳留郡事而彌有戌堂邑之文則北陳留與秦郡皆僑治堂邑矣州郡志秦郡有尉氏縣又稱永初郡縣領平邱外黃離邱沒儀諸縣此皆陳留縣名可

證晉末本有陳留郡殆義熙九年土斷僑流郡縣時  
并入秦郡也

向靖傳

名與高祖同 宋武帝王父名靖當云名與高祖祖諱  
同

劉懷慎傳

仍督江北淮南諸軍事前將軍南晉州刺史 晉當作  
青是歲青州刺史植祇卒於廣陵故以懷慎代之

高祖遷都壽春 晉書恭帝紀元熙元年八月劉裕移  
鎮壽陽卽其事也宋雖建國猶杜臣位不當遽云遷

都

劉粹傳

封澠縣男

袁廷檣曰澠下脫陽字州郡志江夏郡有

澠陽縣徐美之傳作澠陽縣男

孟懷玉傳

義熙八年遷江州刺史尋督江州豫州之西陽新蔡汝

南潁川司州之松滋六郡諸軍事

庾悅傳亦云六

郡今數之止五郡且松滋郡屬揚州不屬司州蓋有

脫文也攷義熙初何無忌都督江州表稱司州之恒

農揚州之松滋二郡寄在潁陽人戶雜居竝宜建督



安帝從之庾悅承無忌之後而懷玉繼之皆兼督恒  
農松滋二郡并豫州四郡故云六郡傳文當云司州  
之恒農揚州之松滋今本脫去五字耳義熙土斷以  
後省恒農松滋二郡皆爲縣屬尋陽故檀韶王宏鎮  
江州但云督豫州之西陽新蔡二郡不更言恒農松  
滋也

朱齡石傳

臧熹敬皇后弟咸服高祖之知人 南史臧熹敬皇后  
弟也亦命受其節度及戰剋捷衆咸服帝知人此文  
敬皇后弟下當有脫文

尋進監益州巴西梓潼宕渠南溪中秦州之安固懷寧  
六郡諸軍事 按巴西以下四郡晉時屬梁州宋元  
嘉以後始改隸益州齡石時爲益州刺史而兼監梁  
州之四郡秦州之二郡故云六郡也益州當爲梁州  
州下脫之字以吉翰張茂度傳證之可見

安固懷寧二郡晉書

地理志  
俱失載

傅宏之傳

晉武帝太康三年復立靈州縣 按晉志北地無靈州  
縣

垣護之傳

以爲督冀州之濟南樂安太原三郡諸軍事寧遠將軍  
冀州刺史 是時冀州寄治歷城領廣川平原清河  
樂陵魏郡河閒頓邱高陽勃海九郡而濟南樂安太  
原三郡乃在青州管內太原郡寄治濟南太山境內常以冀州刺  
史兼督之張永申恬傳竝云督冀州青州之濟南樂  
安太原三郡諸軍事冀州刺史可證也此冀州下當  
有青州二字

俄遷大司馬輔國將軍領南東海太守 大司馬下當  
有脫文是時江夏王義恭以大司馬領南徐州刺史  
除護之爲大司馬僚佐兼郡守非遷大司馬也

進督徐州之東莞

闕二郡軍事

時護之以青冀二州

刺史鎮歷城故事青州刺史常兼督徐州之東安東

莞二郡則此闕文當爲東安二字

宗室傳

長沙王道憐

時北青州刺史劉該反

按此時青州

之地尙爲慕容氏所據北青州當僑立於徐州境

代諸葛長民爲并州刺史義昌太守

按晉末僑置并

州於江北義熙初劉道規除督淮北諸軍事并州刺

史義昌太守道規移鎮江州而諸葛長民代之長民

移青州因以道憐代之但假以軍號仍領石頭戍也

晉書長民傳不云爲并州刺史蓋史之闕漏

永初元年省并

州入南兖

臨川王義慶

元嘉十六年改授都督江州之西陽晉

熙新蔡三郡諸軍衛將軍江州刺史

當云豫州之

西陽晉熙新蔡史脫豫州二字

庾悅傳

盧循逼京都以爲督江州豫州之西陽新蔡汝南潁川

司州之松滋六郡諸軍事建威將軍江州刺史司

州下有說文當云司州之恒農揚州之松滋也一本

六郡作五郡蓋校書者不知史有脫字而以意改之

耳

褚叔度傳

出爲使持節監雍梁南北秦四州之南陽竟陵順陽義陽新野隨六郡諸軍事征虜將軍雍州刺史 是時南陽六郡皆屬荊州志於四州下脫去荊州二字

子曖

一作授

尙太祖第六女琅邪貞長公主 按后妃傳

王藻尙太祖第六女臨川長公主諱英媛藻下獄死主再適豫章太守庾沖遠未及成禮而沖遠卒琅邪臨川俱稱第六女恐有一誤

張永傳

永以申坦竝爲統府撫軍將軍蕭思話所收繫于歷城  
獄 時永爲冀州刺史而思話以徐兖二州刺史持  
節監徐兖青冀四州故云統府褚叔度傳交州刺史  
杜慧度以事言統府時叔度以廣州刺史都督交廣  
二州也

起永督青州之東安東莞二郡諸軍事輔國將軍青州  
刺史 按東安東莞二郡屬徐州不屬青州當云督  
青州徐州之東安東莞二郡史脫徐州二字以杜驥  
顏師伯傳證之可知也一本作樂安東萊兩郡元杜  
青州管內何須更書此校書者以意妄改耳

臧燾傳

子寅尚書主客郎徐羨之征西功曹爲攸之盡節事杜  
攸之傳 徐羨當作沈攸攸之傳所載功曹臧寅卽  
其人也寅與休文爲齊臣故於袁粲沈攸之皆以反  
叛書而臧寅爲攸之盡節特書以美之直道之在人  
心不可泯也

徐廣傳

廣子豁杜良吏傳 按良吏傳豁乃廣兄子晉太子右  
衛率邈之子也史脫兄字

傅隆傳



遷御史中丞 按南齊書陸澄傳云宋世左丞羊元保  
彈豫州刺史管義之譙梁羣盜免義之官中丞傳隆  
才糾亦免隆官此傳不載免官事殆糾而未行也

### 范泰傳

順陽山陰人也 按州郡志順陽無山陰縣梁書范雲  
范縝傳竝云南鄉舞陰人南鄉與順陽本一郡似山  
陰當爲舞陰之譌而州郡志舞陰屬南陽不屬順陽  
未詳其故

潁川陳載已辟太保掾而國子取爲助教卽太尉淮之  
弟 淮當作準史家避順帝諱改準爲淮因譌爲淮

耳荀伯子傳故太尉廣陵公陳淮亦準之謫

荀伯子傳

故太保衛瓘本爵蕭陽縣公 蕭陽晉書作菑陽攷晉

書地理志不見此二縣名

武三王傳

義宣別有傳 義宣上當有義康二字

廬陵王義真 乃以義真行都督雍涼秦三州之河東

平陽河北三郡諸軍事安西將軍雍州刺史 按晉

志河東平陽二郡屬司州河北縣本屬河東郡蓋是

時析置爲郡也三州下當有司州二字

毛德祖督司州之河東平

陽河北見  
索虜傳

又進督并東秦二州司州之東安定新平二郡諸軍事  
領東秦州刺史 按東安定新平二郡舊置旋失故  
不見於州郡志然攷晉志安定新平皆雍州屬郡而  
營浦侯遵考傳云長安平定以督并州司州之北河  
東北平陽北雍州之新平安定五郡諸軍事則此二  
郡當屬雍州非司州矣彼傳云五郡而數之止四郡  
蓋脫一郡以此傳前後文參證之則所脫者卽河北  
郡也

王華傳

以長弟終紹封 南史終作佟

何尚之傳

孟顗字彥重本昌安人 按武帝紀稱平昌孟昶昶族弟懷玉傳云平昌安邱人南史謝靈運傳附見孟顗事亦云平昌安邱人此本字當爲平之譌安下又脫邱字

顗之尚太祖第四女臨海惠公主 按趙倫之傳倫之孫倩尚文帝第四女海鹽公主與臨海未審卽一人否或與趙離婚之後再嫁何氏又進封臨海也

謝靈運傳

申譖事於周王 譖當作譖申伯食采於謝爲謝氏得  
姓之始故引詩疊疊申伯王績之事

造步兵而長想 步兵當作步邱

作山居賦并自注以言其事 按宋世文士以謝顏爲  
首故各立專傳而靈運傳載其兩賦山居一篇并自  
注亦詳載之休文之傾倒於謝至矣此例前史未有  
繼之者張淵之天象顏之推之觀我生十七史中唯  
此三賦有注耳

兩智通沼 智字不見字書訪之通人亦無知者

武二王傳

攷異

宋書二

七

南郡王義宣 元嘉十三年出都督江州豫州之西陵

晉熙新蔡三郡諸軍事鎮南將軍江州刺史 西陵

蓋西陽之譌州郡志西陽本屬豫州孝武孝建元年  
度郢州明帝泰始五年又度豫後又還郢攷漢之西  
陽在淮水之南卽今光山縣地晉南渡後荊州刺史  
庾翼表移西陽新蔡二郡荒民就陂田于尋陽而江  
州界內遂有僑立之西陽郡矣自後西陽與新蔡汝  
南潁川謂之豫州四郡江州刺史常兼督之義熙土  
斷省汝南潁川兩郡又分廬江立晉熙郡故自義熙  
十二年訖元嘉之末除江州督者必兼督豫州之西

陽新蔡晉熙三郡也孝武之世晉熙王昶晉安王子  
勛始安王休仁除江州刺史則云都督郢州之西陽  
豫州之新蔡晉熙三郡其時西陽已度郢州矣王景  
文以泰始二年除刺史西陽尙屬郢州及泰始六年  
桂陽王休範出爲都督江郢司廣交五州豫州之西  
陽新蔡晉熙湘州之始興四郡諸軍事江州刺史則  
西陽仍屬豫州也元徽元年晉熙王變爲使持節監  
郢州豫州之西陽司州之義陽二郡諸軍事郢州刺  
史其時西陽尙屬豫州而却杜郢州部內矣

沈攸之傳

今遣新除使持節督郢州之義陽諸軍事平西將軍郢  
州刺史黃回 按黃回傳督郢州司州之義陽諸軍  
事此脫司州二字

柳元景傳

除寧朔將軍京兆廣平二郡太守於樊城立府舍率所  
領居之 時京兆廣平二郡皆僑治襄陽

沈慶之傳

領軍將軍劉湛之 之字衍下文及湛之被收同

蕭思話傳

聚黨於東莞發干縣 按州郡志發干屬東安不屬東



莞

南漢中太守蕭諱 此傳稱蕭諱者齊高帝之父承之  
追諡宣帝者也略陽清水氏傳思詔使司馬蕭諱先  
驅進討亦謂承之

文五王傳

廬江王祚 都督廣交二州荊州之始興臨安二郡諸  
軍事平越中郎將廣州刺史 按臨安非郡名當云  
荊州之始興臨賀始安三郡傳寫脫誤耳州郡志於  
始興臨賀始安郡並云晉成帝度荊州宋元嘉二十  
九年度廣州據此傳知元嘉二十九年特以廣州刺

史兼督此三郡其地猶屬荊州也

孝武十四王傳

始安王子真 監廣交二州始興始安臨賀三郡諸軍  
事平越中郎將廣州刺史 按是時始興三郡屬湘  
州當云湘州之始興始安臨賀此脫去三字以臨海  
王子項傳證之可知也

王景文傳

高祖第五女新安公主先適太原王景溪離絕當以適  
景文固辭以疾故不成婚 按褚叔度傳弟湛之尚  
高祖第七女始安哀公主主薨復尚高祖第五女吳

郡宣公主吳郡主以姊繼妹必是改醮殆始封新安  
進封吳郡耳徐湛之母會稽長公主永初三年詔稱  
永興公主亦是始封永興進封會稽也王僧綽尙東  
陽獻公主而王儉傳稱嫡母武康公主當亦始封武  
康進封東陽也孝武女山陰公主廢帝時改封會稽  
長公主史所載獨此一事餘皆無明文

讀論語至周監於二代外祖何尙之戲之曰耶耶乎文

哉 六朝人呼父爲耶梁世費昶詩云不知是耶非

簡文謂昶不識其父見顏氏家訓今本昶作旭傳寫之譌此亦

以父名戲之也說文然有文章也論語郁郁乎文哉

本當作馘後人省去有勿隸變爲或荀或字文若王  
或字景文皆取斯義讀此傳知六朝論語本爲或字  
今以郁夷字代之音同而義別矣

絢卽荅曰草翁

毛本作  
蒦誤

風必偃

南史云草翁風必舅

蓋尙之子名偃於絢爲舅也此作偃乃校書者妄改  
殷孝祖傳

遷西陽王子尙撫軍寧朔將軍南濟陰太守 撫軍下

當有脫文是時子尙以撫軍將軍都督南徐兗二州  
南濟陰卽南徐州屬郡孝祖蓋爲撫軍府僚佐而帶  
南濟陰太守也

沈文秀傳

景和元年遷督青州之東莞東安二郡諸軍事建威將軍青州刺史 當云督青州徐州之東莞東安二郡史脫徐州二字下文詔書可證

遣將慕容白曜 南北史俱作慕容白曜容與聲相近袁粲傳

王蘊謂粲已敗卽偃散走齊王以報敬則率所領收蘊殺之并誅伯興 按是時劉韞爲領軍將軍直門下省卜伯興爲直閤故粲欲令二人率宿衛兵攻蕭道成而道成亦以王敬則爲直閤防二人之變此敬則

所殺者劉韞非王蘊也王蘊自石頭逃鬪場被禽斬  
于秣陵市與伯興非同時傳因上文有蘊謂粲已敗  
云云故誤爾當從南史

恩倖傳

戴法興 山陰有陳載者家富 南史作陳戴

阮佃夫 李道兒新塗縣侯 南史作新渝或是新塗  
之譌州郡志新塗新喻皆侯相

荆雍州蠻傳

有維谿楠谿辰谿酉谿舞谿 舞谿南史作武溪

天門淩中令宗僑之 南史作宋矯之

南陽太守朱異韶 南史作朱韶

且渠蒙遜傳

武威人焦朗入姑臧 晉書作魏安人魏安當是張氏  
呂氏所置郡縣名也

蒙遜攻焦朗殺之 晉書云攻朗克而宥之與此傳不  
同

追到西支間 晉書作解支澗解當作鮮鮮西聲相近  
也

蒙遜第三子茂虔 茂虔北史作牧健茂牧聲相近健  
與虔同音

自序

昔金天氏有裔子曰昧生允格臺駘臺駘能業其官帝  
顓頊嘉之封諸汾川其後四國沈如蓐黃沈子國今  
汝南平輿沈亭是也 按休文自序家世謂出少昊  
之裔而唐書宰相世系表言沈氏出自姬姓周文王  
第十子聃叔季食采于沈今汝南平輿沈亭卽其地  
也二說互異攷臺駘封于汾川沈國亦當近汾與汝  
南相去甚遠古讀沈如耽耽與聃又相通用則唐表  
較之休文序爲可信矣但唐表謂魯成公八年爲晉  
所滅沈子逞奔楚生嘉嘉二子尹丙尹戊尹戊爲楚



左司馬則謬妄已甚蔡滅沈以沈子嘉歸在魯定公四年而沈尹將中軍乃在魯宣公時若沈尹戌與吳戰亦卽蔡滅沈之歲也表以戌爲嘉子又改戌爲戊且沈尹本以官爲氏乃割尹字連下爲名尤極荒唐不如休文自序之當也

刺史褚升度至 升當作叔

桓元譙縱盧循馬魯之徒身爲晉賊非關後代 按司馬休之魯軌忠于晉室奈何稱爲晉賊使與桓譙同科且休文修史已杜易代之後非有回避而不爲別白良史之義豈其然乎徐爰宋書今已失傳據此表

知列傳託始桓元兼及譙縱盧循司馬休之魯軌吳  
隱之謝混郗僧施劉毅何無忌魏詠之檀憑之孟昶  
諸葛長民諸人蓋沿陳壽范蔚宗之例而沈約非之  
自後南北八史列傳祇述開國功臣胥用沈法至新  
舊唐書乃復遵兩漢之例以李密王世充等列於功  
臣傳之前矣又攷恩倖傳爰初議本欲以桓元比新  
莽入之晉書孝武詔引項籍聖公之例今入宋典而  
休文自序稱臧質魯爽王僧達諸傳皆孝武所造然  
則唐人修晉書題云御撰亦有前例也